

Jut

anêṅ kapya

Abô mông

Yisu yaṅ molok Jut hato kapya êntêk. Abô Glik ma elam nena Judas (Matyu 13:55; Mak 6:3). Hato ek ṅê êvhaviṅ neyabiṅ i esak kêdôṅwaga abôyaṅ takatu ba ekopak êmô thêlô malêvôṅ. Kêdôṅwaga abôyaṅ enaṅ nena avômalô êvhaviṅ hatôm nindum kambom ek malê nena Wapômbêṅ anêṅ lahiki ma bêṅ anôṅ ba intu avômalô êvhaviṅ idum kambom ma tem miṅ nêṅ vovaṅ êndêṅ i ami.

Hato kapya êṅ hadêṅ 65 AD la.

Jut hêv lamavi

1^aYa Jut, Yisu Kilisi anêṅ anyô ku ma Jems anêṅ yaṅ molok. Yahato kapya êntêk ek môlô takatu ba bôk halam yôv ek nôṃô Kamik Wapômbêṅ anêṅ lahaviṅ kapô lôk Kilisi eyabiṅ môlô.

2 Wapômbêṅ anêṅ kapô lôk labali ma lahaviṅ êmô imbiṅ môlô bêṅ anôṅ.

Noyabiṅ am ek kêdôṅwaga abôyaṅ

3 Aiyaṅ thêlô, ya vovaṅ ek yato abô esak Wapômbêṅ anêṅ bulubiṅ atu ba bôk hapôm alalô yôv. Ma doṅtom lêk malaiṅ bêṅ te habitak. Ba intu yahato ek yasoṅ môlô lokwaṅ ek numiṅ lôklokwaṅ ba nobaloṅ abô avanôṅ takatu ba alalô aêvhaviṅ loṅ. Wapômbêṅ bôk hêv abô avanôṅ êṅ yôv hadêṅ anêṅ avômalô matheṅ ek neyabiṅ katô. ⁴^bMalaiṅ êṅ ma aêntêk. ṅê abôyaṅ doho lêk eyenak ba ekopak êmô môlô kapô. Thêlô êpôlik ek alalôaniṅ Wapômbêṅ. Ma ethalamuniṅ anêṅ wapôm ek nindum sek waliliṅ lomaloma esak. Ma êvôliṅ dômiṅ ek alalôaniṅ Avaka atu Anyô Bêṅ, Yisu Kilisi. Bôsêbôk ma eto abô hathak vovaṅ takatu ba tem êpôm thêlô.

^a 1 Mat 13:55 ^b 4 Gal 2:4; 2Pi 2:1

⁵Abô takêntêk ba tem yanaŋ ma bôk olaŋô yôv. Ma doŋtom tem yanaŋ esak loŋbô ek lemimimbi katô. Sêbôk ma Anyô Bêŋ hêv anêŋ avômalô bulubiŋ ba hawa i vê hêk Ijip. Ma doŋtom vêm ma hik takatu ba miŋ êvhaviŋ ami pôpônô. ⁶Ma lemimimbi aŋela taksêbôk atu ba etak iniŋ loŋ ba i mayaliv ma miŋ êmô iniŋ loŋ lôkliŋyak tiŋiŋ ami. Ba intu Wapômbêŋ bôk hakak i loŋ hathak yak atu ba miŋ hatôm itip ami. Ma hadô i hamô loŋ momaŋiniŋ bêŋ kapô ek neyabiŋ waklavôŋ bêŋ nindum abô. ⁷Ma aêŋ iyom, bôk Sodom lo Gomola ma malak vi takatu ba êmô habobo êv i ek idum sek waliliŋ lôk ethak i mayaliv. Êŋ ma Wapômbêŋ habôk malak takêŋ hathak atum ba hik vovaŋ atum atu ba tem êpôm ŋê kambom thô hadêŋ alalô ek miŋ nasopa veŋiŋgwam ami. Atum êŋ tem esaŋ êtôm wak nômbêŋ intu sapêŋ.

⁸Ma doŋtom lêk ma ŋê abôyaŋ takêŋ idum kambom takêŋ aêŋ iyom. Thêlô esopa iniŋ niaviŋ ba idum iniŋ leŋviŋkupik habitak lônŋgôlôn lôk êdô nêwê Anyô Bêŋ lôk ŋê bêŋbêŋ vibiiŋ ma esokwaŋ aŋela lôk athêŋ anêŋ leŋ. ⁹Ma doŋtom Maikel, aŋela lôk athêŋ bêŋ atu, miŋ hadum aêŋ ami. Mi, sêbôk ba thai lôk Sadaŋ êkôki hathak Mose liŋkupik ma Maikel miŋ hasokwaŋ Sadaŋ ba hanaŋ anêŋ kambom bêŋ ami. Mi. Yani hanaŋ nena, “Anyô Bêŋ da tem esaŋ o.” ¹⁰Ma doŋtom lêk ŋê abôyaŋ takêŋ esokwaŋ nômkama takatu ba miŋ eyala ami. Hatôm alim bomaŋ, thêlô eyala leŋviŋkupik anêŋ thethaŋak iyom ba nôm takêŋ habuliŋ thêlô.

¹¹^hKikaknena, malaiŋ bêŋ tem êpôm i! Thêlô esopa Kain atu ba hik yaŋ molok vônô vaŋgwam lôk esopa Balam anêŋ kambom lahaviŋ vuli ba havôv avômalô ek nindum kambom. Lôk êtôm Kola atu ba kapô hagiap ek Wapômbêŋ ba intu tem nema êtôm yani.

¹²ⁱMôlô othak doŋtom ek oŋgwaŋ nôm lemimhaviŋ am, êŋ ma ŋê takêŋ lêk êtôm nôm lelaik hamô môlô malêvônŋ. Esoŋ nena nôm êŋ ma nôm oyaŋ ba miŋ leŋiŋhabi Wapômbêŋ ami. Ma leŋiŋhabi thêlôda iyom ba eyaŋ ma leŋiŋpaliŋ avômalô vi. Thêlô miŋ ik anôŋ ami hatôm buliv atu ba lovak hayuv vôkê ba miŋ ôthôm hik ami. Thêlô êtôm alokwaŋ takatu ba miŋ hik anôŋ hadêŋ anêŋ waklavôŋ ami ba intu elav ôdônŋ thô, êŋ ma hatôm ŋama hapôm i bôlônŋ ju. ¹³Thêlô hatôm ŋgwêk beleŋ lokwaŋ ba iniŋ kambom hatôm ŋgwêk budum haŋgôli ba anêŋ wapôk thapuk hik iniŋ mama thô. Ma êtôm vuliŋ atu ba i mayaliv. Wapômbêŋ bôk hapesaŋ bôlôvônŋ momaŋiniŋ kambom bomaŋ bêŋ te ek thêlô nêmô aêŋ êtôm wak nômbêŋ intu sapêŋ.

¹⁴JInok ma Adam anêŋ lim ôdônŋ te baherŋvi ba lahavuju. Bôk hanaŋ abô plopet hathak ŋê abôyaŋ takatu ba lêk ibitak nena, “Odaŋô! Anyô

^c 5 Kis 12:51; Nam 14:29-30 ^d 6 2Pi 2:4 ^e 7 Stt 19:1-25; 2Pi 2:6,10 ^f 9 Dan 10:13,21; 12:1; Sek 3:2; 2Pi 2:11; ALK 12:7 ^g 10 2Pi 2:12 ^h 11 Stt 4:7-8; Nam 16:1-35; 2Pi 2:15; 1Jon 3:12 ⁱ 12 2Pi 2:13,17 ^j 14 Stt 5:18,21-24

Bêḡ tem êlêm imbiḡ anêḡ aḡela mathêḡ lubuḡlubuḡ ¹⁵ek endarḡô avômalô sapêḡ iniḡ abô. Ma avômalô takatu ba miḡ esopa Wapômbêḡ ami ma tem nêḡ iniḡ vuli viyaḡ êndêḡ i esak iniḡ kambom takatu ba idum lôk êpôlik hathak yani ba enaḡ abô lôklala.” ¹⁶Thêlô ethak kapôlôḡiḡ diḡdiḡ lôk etha avômalô vi. Ma esopa iniḡ auk thethaḡak. Ma êv ida liḡ lôk ebam avômalô vi ek thêlô leḡiḡmavi esak i ma nêḡnêḡ nômkama êndêḡ i.

Numiḡ lôklokwaḡ

¹⁷O aiyaḡ thêlô, lemimibi abô takatu ba alalôaniḡ Anyô Bêḡ Yisu Kilisi anêḡ aposel bôk enaḡ ¹⁸khadêḡ môlô nena, “Waklavôḡ lôkthô anêḡ daḡ ma tem avômalô vi nimbi Wapômbêḡ lôk anêḡ avômalô liliḡ lôk nesopa iniḡ thethaḡak ma nêpôlik ek Wapômbêḡ.” ¹⁹Abô êḡ hanaḡ hathak ḡê abôyaḡ takatu ba evak môlô vose hi lodôḡlodôḡ. Lovak Matheḡ miḡ hamô haviḡ i ami ba intu esopa auk pik iyom.

²⁰O aiyaḡ thêlô, nodav unim lôkmala esak unim ôêvhaviḡ atu ba mathêḡ anôḡ. Lôk notêḡ mek esak Lovak Matheḡ anêḡ lôklokwaḡ. ²¹Nômô Wapômbêḡ anêḡ lahaviḡ kapô lôk noyabiḡ alalôaniḡ Anyô Bêḡ Yisu Kilisi anêḡ lahiki atu ba tem nêḡ lôkmala atu ba tem êḡmô êtôm wak nômbêḡ intu sapêḡ êndêḡ môlô.

²²Lemim injik am esak avômalô vi atu kapôlôḡiḡ ju. ²³mMa vi atu ba ebobo loḡ atum ma nôbôv i vê ketheḡ ek nêḡ i bulubiḡ. Ma vi atu ba lelaik hathak iniḡ kambom, kapôlômim ek i lôk nôkô esak iniḡ lelaik ek miḡ esale môlô thô ami.

Alalô nambô Wapômbêḡ anêḡ athêḡ

²⁴⁻²⁵nHathak alalôaniḡ Anyô Bêḡ Yisu Kilisi ma nambô Wapômbêḡ doḡtom atu ba hêv alalô bulubiḡ. Yani hatôm eyabiḡ o mavi ek miḡ nêḡ yak ami. Ma tem enja môlô takatu ba kambom mi ba etak môlô numiḡ Wapômbêḡ thohavloma anêḡ deda lôkmaḡiḡ kapô lôk lemimmavi bêḡ anôḡ. Alalô nanêḡ deda lôkmaḡiḡ lôk athêḡ lôkmaḡiḡ ma lôklokwaḡ lôk lôkliḡyak ni êndêḡ yani. Yanida intu hamô aêḡ hadêḡ sêbôk ma lêk ma wak nômbêḡ intu sapêḡ! Avanôḡ.

^k 18 2Pi 3:3 ^l 20 Kol 2:7 ^m 23 Sek 3:2; ALK 3:4 ⁿ 24-25 Lom 16:27; 2Pi 3:18